

## SAS ALAS SUN SICCAS

Cando in artu su sole fit pizzinnu  
e pizzinnas fin tottu sas istellas,  
sa luna incantadora  
mi pintabat desizos  
e chelos de cristallu.

Ah!, dego bi credia. S'universu  
pro mene fit su pradu  
ube frorian solu  
lizos d'amore eternu.

E, bolabo, bolabo  
in agheras de sònrios,  
cantande a boche isparta.

E chin sa luche 'e s'anima  
sonabo sa chitarra 'e sas isperas  
chi fini semper innidas  
che-i sas durches cadenas de su coro.

E chin sa fide arcana 'e sas ideas  
fravicabo nuraches de cossolu  
e casteddos de sole.

Como però, non poto;  
non poto prus bolare  
ca sas alas sun siccas  
e siccas sun sas benas de su coro.

Ma non m'isporo, no!, non mi lamento  
pro mores ch'hapo fizos e nepodes  
chi curren calabrinas de coraddu  
chin asprones de re,  
e chi binchen balentes,  
sos pannos ch'unu tempus mi fin caros.

Poveros nois!, custu  
est s'eternu caminu  
de s'eterna chimera  
chi si ripitit semper  
chin su matessi ispramu.

Teraccos d'unu tempus bardaneri,  
affusaos, sichimus a pistare  
in mulinadas pintas de benenu  
sèghedes ispinosos de malissia,  
chin s'ispera ammeddosica  
d'unu cras prus sinzéru e prus galanu.

## LE ALI SONO SECICHE

*Quando il sole era fanciullo / e fanciulle erano tutte le stelle / la luna maliarda  
/ mi regalava desideri / e cieli di cristallo.*

*Ed io ci credevo. L'universo / era per me il prato / dove fiorivano solo /  
stupendi fiori d'amore.*

*E volavo. Volavo tra mille sogni / cantando spensieratamente.*

*E con la luce dell'anima / suonavo la chitarra della speranza. / che era  
sempre vergine / come le dolci catene del cuore.*

*E con la fede delle idee / costruivo nuraghi / e castelli di sole.*

*Ora però / non posso volare / perché ho le ali secche / e secche son le vene  
del mio cuore.*

*Ma non mi sgomento / perché ho figli e nipoti / che corrono puledri di corallo  
/ con sproni di re / che vincono i premi / che un tempo mi erano cari.*

*Poveri noi. Questo / è l'eterno cammino / dell'eterna chimera / che si ripete  
sempre / con la stessa prassi.*

*Servi di un tempo ipocrita, / confusi, viviamo calpestando / stoppie spinose  
di malizia / con la speranza / d'un domani più bello e più sincero.*